

Kommunimut pilersaarusrusiorneq aamma nunaminertat atorneqarnerat pillugit Namminersornerullutik Oqartussat nalunaarutaat

Pilerausrusiorneq aamma nunaminertat atorneqartarnerat pillugit Inatsisartut peqqussutaanni nr. 11-imi, 5. december 2008-meersumi § 3 naapertorlugu aalajangersarneqarpoq:

Kapitali 1

Siunertaq

§ 1. Kommunalbestyrelsip nalunaarummi matumani maleruagassat malillugit pilerausrusiornermigut aqtsinermigullu, kommunip iluani nunaminertat inuiaqatigiit ataatsimut isigalugit nalilersuiffiusumik atorneqarnissaannik qulakkeerinissamut suleqataanissa nalunaarummi siunertarineqarpoq.

Kapitali 2

Kommunimut pilersaarutit

§ 2. Kommunalbestyrelsip kommunimut pilersaarut makkuninnga imaqartoq suliarissavaa:

- 1) Kommunimut pilersaarummi kommunip ineriertortinneqarnerani siunertaasut anguniakkallu nassuaisorneqarnerinut immikkoortoq, tak. § 5.
- 2) Kommunip ataatsimut pingaarnertut ilusiligaaneranut immikkoortoq, tak. § 6, kiisalu kommuninimi illoqarfitt, nunaqarfitt aammalu nunaannarmi soqutiginaatillit ataasiakkaat pingaarnertut ilusiligaanerannut immikkoortoq, tak. § 7.
- 3) Aalajangersakkanut immikkoortoq, tassanilu aalajangersarneqassapput:
 - a) sumiiffit ilaanni aalajangersimasuni ataasiakkaani nunaminertat atorneqarnerannut illoqarfefqarmullu aalajangersakkat pingaernerit, tak. § 8, aamma
 - b) sumiiffit ilaanni aalajangersimasuni ataasiakkaani nunaminertat atorneqarnerannut illoqarfefqarmullu aalajangersakkat sukumiisut, tak. § 9.
- 4) Kommunalbestyrelsip nunaminertanik atugassisarneranut aalajangersakkat, tak. § 10.
Imm. 2. Nunaannarmi pilersaarusrusiornermut nunaminertanullu oqartussaaffiup 1. januar 2011-imi kommuninut tunniunneqarnissaata tungaanut nunaannarmi nunaminertanik aqtsineq Naalakkersuisunit kapitali 4-imi aalajangersakkat naapertorlugit isumagineqassaaq.

Kommunimut pilersaarusrusiornermi periaasissat

§ 3. Kommunalbestyrelsi kommunimi piffissap qinigaaffiusup affaa siulleq qaangiutsinnagu kommunimut pilersaarusrusiornermut periaasissanik saqqummiussissaq. Aamma periaasissaq taamaattoq pisariaqartutut naapertuuttutulluunniit isumaqarfingeqarpat communalbestyrelsi taamaattumik

saqqummiussisinnaavoq. Tamatumunnga peqatigitillugu periaassisatut aalajangiunneqartoq tamanut ammasumik saqqummiunneqartoq Naalakkersuisunut oqartussaasunullu soqutigisaqarnikkut kalluarneqartunut nassiunneqassaaq.

Imm. 2. Kommunalbestyrelsimi ilaasortat arlaalluunniit, periaassisatut siunnersummut imm. 1-imi taaneqartumut isummaminik allaasumik aalajangernissamut allattaavinnut ilanngussititsinissamik piumasaqarsimasoq, isummami allaasup tamanut ammasumik saqqummiunneqarnissaq piumasarisinnaavaa, tassungalu tunngavilersuut naatsoq, ilaasortamit oqaasertaliorneqartoq ilaatinneqassaaq.

Imm. 3. Periaassisatut siunnersuut, imm. 3 naapertorlugu ikinnerussuteqartut oqaaseqaatigisinnaasaannik ilaqtarinneqartoq, sumiiffimmut innuttaasunit tikikkuminartumut, oqaaseqaateqarnissamut allannguutissanillu siunnersuuteqarnissamut sivikinnerpaamik sapaatit akunnerinut arfinilinnut piffissalerlugu tamanut saqqumititassanngorlugu saqqummiunneqassaaq. Saqqummiussineq piffissaliussarlu pillugit tamanut nalunaaruteqarnermi, periaaseq kommunimi nalinginnaasumik atorneqartartoq atorneqassaaq.

Imm. 4. Imm. 3 naapertorlugu piffissaliussap naanerani kommunalbestyrelsip nutaamik suliarinninnermigut periaassisaaq inaarutaasumik akuersissutigisinnaavaa. Tamatumunnga atatillugu kommunalbestyrelsip oqaaseqaatit tiguneqartut isummerfigissavai. Kommunalbestyrelsip tamatumunnga atatillugu tamanut ammasumik periaassisamut allannguutissat akuersissutigisinnaavai.

Imm. 5. Kommunalbestyrelsip periaassisaaq tamanut ammasumik saqqummiutissavaa, aammalu nalunaarummik tamanut ammasumik saqqummiunneqartumik naqitamik ataatsimik oqartussaasunut, imm. 1-imi taaneqartunut nassiussissalluni.

§ 4. § 3, imm. 5 naapertorlugu tamanut ammasumik nalunaaruteqartoqareerpat, kommunalbestyrelsip periaassisami aalajangerneqartunik taamaattunik kommunimut pilersaarummut tassungaluunniit allannguutissanik siunnersuusiussaaq.

Kapitali 3

Kommunimut pilersaarutit imai

Kommunimut pilersaarutit nassuaasiernermut immikkoortuat

§ 5. Nassuaammut immikkoortoq § 2, imm. 1-ip immikkoortuini siullermi taaneqartoq makkuninnga imaqassaaq:

1) Suliassaqarfinnut agguataakkamik killiffinnut nassuaat, ilanngullugit kommunimi najugaqariaatsimut, innuttaasut ineriantornerannut aammalu kommunimi inuussutissarsiutit ineriantornerinut kiisalu sanaartorfiusimaneranut nassuaat.

2) Immikkoortoq anguniakkanut tunngasoq, kommunalbestyrelsip kommuuni ataatsimut isigalugu ineriantortsinissamut nunaminertanillu atuinissamut anguniagaannik nassuaateqarfiusoq, ilanngullugit inissiat inuussutissarsiurfullu annertusarneqarnissaat, attaveqaatinut atortut aamma isumaginninnikkut, kulturikkut ilinniartitaanikkullu sullissivinnik pilersuineq, kiisalu sumiiffit sukisaarsaartarfiit.

3) Pilersaarummut nassuaat, kommunimut pilersaarummi pilersaarutit allat qanoq eqqarsaatigineqarsimanersut pillugu nassuaaffiusoq, ilanngullugit nuna tamakkerlugu pilersaarusiorneq, Naalakkersuisut kommunillu aningaasaqarnikkut pilersaarutaat kiisalu kommunip maannamut pilersaarutai.

Kommunimut pilersaarutit pingaarnertut ilusiliinermut immikkoortuat

§ 6. Kommuni ataatsimut isigalugu pingaarnertut ilusiliineq § 2, imm. 1-ip immikkoortuata aappaani taaneqartoq, kommunimi najugaqariaatsip nunaannarmilu nunaminertat ineriarornerannut pingaarnermut pilersaarutit naliliiffingeqarnerat tunngavigalugu aalajangersarneqassaaq.

Imm. 2. Tamatuma saniatigut kommuni ataatsimut isigalugu pingaarnertut ilusiliineq imm. 1-imi taaneqartoq, killifinnut nassuaammik, aammalu attaveqaatit naalagaaffimmit, Namminersornerullutik Oqartussanit kommuninillu pigineqartut ataatsimut atorneqarnerisa siunissami ineriarornissamut periarfissaannik naliliisummiq imaqarsinnaavoq.

§ 7. Kommunini illoqarfinni, nunaqarfinni nunaannarmilu soqtiginaatilinni ataasiakkaani ilusissat pingaernerit § 2, imm. 1, nr. 2-mi taaneqartut, nassuaasiornermut immikkoortup suliassaqarfinnut pilersaarutitaannik eqikkaalluni naliliinikkut aalajangersarneqassapput kiisalu nunami sumiiffinnut agornilersuineq killeqarfilsuinerlu aalajangersarneqassalluni.

Imm. 2. Imm. 1 naapertorlugu kommunimut pilersaarutip ilusissaani pingaerner mi kommunimi sumiiffit ilaasa inissiffissaat killissaallu makku eqqarsaatigalugit aalajangersarneqassapput:

- 1) inissiat,
- 2) sumiiffit inuussutissarsiutinik ingerlataqarfiusut umiarsualiviillu, ilanngullugit nunaminertat suliffeqarfinnut avatangiisinut mingutsitsisunut atorneqartut, kiisalu nunaminertat mingutsitsiviusut mingutsitsiviusinnaasutullu ilimanaateqartut,
- 3) qitiusoqarfiit, ilanngullugit sumiiffit ataatsimoortumik atorneqartussatut siunertaqarfiusut kiisalu pisortat sullissiviinut atorneqartut il.il.,
- 4) sumiiffit sanaartorfingeqquaangitsut aamma sumiiffit sukisaarsaarnermik siunertaqarfiusut, ilanngullugit sunngiffimm atortut anginerit il.il.,
- 5) pilersuiner mi teknikkimut atortoqarfiit atortullu attaveqarnermut tunngasut allat, ilanngullugit angallanner mi atugassatut sanaartukkatt,
- 6) illuaqqat, nunaleriffit, orpinnik naatiteriffit, qimmeqarfiit, kuuit, tatsit, sinerissami nunaminertanik atuineq, imaanik atuineq, sumiiffit pinngortitat kulturilluunniit oqaluttuarisaaneranik immikkut soqtiginaatillit, sumiiffit sukisaarsaarnermut immikkut atorneqartut il.il.

Imm. 3. Kommunimut pilersaarutip immikkoortuinik imm. 2 naapertorlugu aalajangersaanermut atatillugu makku aalajangersarneqassapput:

- 1) sanaartukkanut, isumannaallisaaneq imaluunniit sanaartugartarpiaasa (killeqarfiit immikkut akuerisaasut) isumannaarneqarnissaat eqqarsaatigalugu, kiisalu nunaminertanut imermik milluaaffiusunut il.il. illersuinissamut killeqarfiit,
- 2) eqqisisimatitanik eriagisassanillu isumaginninneq, ilanngullugit illut illoqarfiallu ilai eqqisisimatitat eriagisassallu, kiisalu pinngortitami pingaartitat sumiiffilluunniit immikkut eriagisassat.
- 3) sumiiffit ilaasa atorneqalernissaannut allilerneqarnissaannullu tulleriaarineq.

Imm. 4. Aamma imm. 1 naapertorlugu pingaarnertut ilusiliinermi pissutsit allat, nunaminertamik atuinermut sanaartukkanullu annertuumik pingaarutillit aalajangersarneqarsinnaapput.

Kommunimut pilersaarutit aalajangersakkanut immikkoortui, aalajangersakkat pingarnerit

§ 8. Nunaminertat atorneqarnerannut sanaartukkanullu aalajangersakkat pingarnerit § 2, imm. 1, nr. 3 a)-mi taaneqartut, sumiiffit ilaannut aalajangersimasunut ataasiakkaanut makku eqqarsaatigalugit

aalajangersarneqassapput:

- 1) nunaminertat illoqarfearfiullu atorneqarnerat, ilanngullugit sullissiviit pisortalluunniit kiffartuussiviisa allat inisisimaffi,
- 2) illoqarfearfiup suussusaa, inisisimanera annertussusaalu, ilanngullugit ilaatigut illut eqimassusissaasa, portussusissaassa, imminnut ungasissusissaasa ilusissaasalu malittarisassiornerat,
- 3) sumiiffiup ilaani aalajangersimasumi inissiat inuussutissarsiutilluunniit eqqarsaatigalugit sanaartorfiunngitsunit sinneruttut,
- 4) pigisat eqqissisimatitat eriagisassallu, ilanngullugit illut, sanaartukkat sumiiffilluunniit eqqissisimatitat eriagisassalluunniit, pinngortitami pingaartitat eriagisassat kiisalu sumiiffit kulturip oqaluttuarisaaneranut iluatinnaatillit,
- 5) qaartartuusivinnut, tankeqarfinnut, mittarfinnut, imermut pissamaateqarfittut immikkoortitanut, nalunaarasuartaaserisoqarfinnut ikuallattoqarnissaanullu upalungaarsimaffinnut isumannaallisaanermut killeqarfait,
- 6) sumiiffiup ilaani aalajangersimasumi angallaffit aamma pilersuinermi atortut inisisimaffi, ilanngullugit aqqusernit ledningeqarfilli,
- 7) sumiiffiup ilaani aalajangersimasumi illoqarfup nutarterneqarnera isaterinerlu,
- 8) sumiiffiup ilaani aalajangersimasumi tulleriaartumik annertusaaneq,
- 9) sumiiffiup ilaani aalajangersimasumi, nuna tamakkerlugu pilersaarusiornermut soqtiginaatillit isumannaarneqarnissaat siunertaralugu Naalakkersuisunit aalangiunneqarsimasumi, immikkut aalajangersakkat.

Imm. 2. Imm. 1 naapertorlugu aalajangersakkani pingarnerni kommunimut pilersaarutip naammassineqarnissaanut kommunalbestyrelsip akuersinerata saniatigut oqartussaasunit allanit akuersissutinik pissarsinissaq pisariaqartinneqarnersoq allanneqassaaq.

Kommunimut pilersaarutit aalajangersakkanut immikkoortui, aalajangersakkat sukumiisut

§ 9. § 2, imm. 1, nr. 3 b) naapertorlugu aalajangersakkani sukumiisuni sumiiffiup ilaata aalajangersimasup atorneqarneranut siunertaasoq allanneqassaaq.

Imm. 2. § 2, imm. 1, nr. 3 b) naapertorlugu sumiiffit ilaannut aalajangersimasunut ataasiakkaanut aalajangersakkat sukumiisut pissutsit makku pillugit aalajangersarneqarsinnaapput:

- 1) illoqarfearfiup inissiffissa, ilanngullugit sanaartorfissanik aalajangersaaneq,
- 2) illut silataasa isikkussaat, ilanngullugit ilaatigut ilusilersorneqarnissaannut, qaliaasa ilusissaannut, toqqaviisa portussusissaannut, atortunut qalipaasersorneqarnissaannullu aalajangersakkat,
- 3) aqqusernit pisuinnaallu aqqutaat, aammalu pissutsit allat angallannermut pingaruteqartut, ilanngullugit angallaffiusunut aqqtissat aamma angallattut assigiinngitsut avissaartisimaneqarnissaannut tunngasut,
- 4) sumiiffiup ilaani aalajangersimasumi nunaminertanik atorneqanngitsunik sunngiffimmiluunniit atortoqarfiusinnaasunik peqarnissaa,
- 5) ledningeqarfuit inisisimaffi, ilanngullugit innaallagissamik imermillu pilersuineq,
- 6) nunaminertat sanaartorfiunngitsut ilusaat, atorneqarnerat allanngutsaolineqarnerallu, ilanngullugit nunaminertat atorneqanngitsut, nunamik manissaanerit, ungalulersuineq, naasunik allanngutsaaliuined kiisalu aqqusinernik angallaffiusunillu allanik qaammaqquusersuinerit,
- 7) illunik pioreersunik taakkulu avatangiisaannik qaninnernik allanngutsaaliuineq, taamaalilluni illut

aatsaat kommunalbestyrelsip akuersissuteqarneratigut isaterneqarsinnaallutik, allanngortiterneqarsinnaallutik allatulluunniit allannguiffingineqarsinnaallutik, 8) pinngortitamik illersuinissamik soqtigisanik isumaginninneq kiisalu nunaminertanik ilutsimikkut nalilinnik allanngutsaaliuineq, 9) nunalerinermi soqtigisanik isumaginninneq, ilanngullugit nunaleriffit immikkut naleqartut qulakkerneqarnissaat, 10) atortunut ataatsimoorussanut, angallaffinnut teknikkikkulluunniit pilersuinermi atortunut atugassiineq attaviliinerluunniit, imaluunniit sanaartukkat nutaat atorneqalissappata sumiiffit pilersaarutip avataaniittut atuilernissaannik piumasaqaateqarneq, 11) atortunik ataatsimoorussanik pilersitsinermut atatillugu aningasaqarnermut tunngasunik maleruagassiorneq, ilanngullugit atuisinnaatitaanermik pigisaqartunut peqatigiiffimmik pilersitsineq, tassunga ilaasortaanissamut pisussaaffeqarneq aamma peqatigiiffiup nunaminertanik ataatsimoorussanik atortunillu ataatsimoorussanik pilersitsinissamut, ingerlatsinissamut aserfallatsaaliuinissamullu pisinnaatitaaffeqarnerat pisussaaffeqarnerallu, aamma 12) nipimik, pujoralammik, tipimik allanillu avatangiisinut ajoqutaasinnaasunik killilersuineq, ilanngullugit nunaminertat illullu saniliusut eqqarsaatigalugit atorneqarnissaannut killilersuutaasinnaasut.

Imm. 3.§ 2, imm. 1 nr. 3 b) naapertorlugu sumiiffiup ilaanut aalajangersimasumut imm. 2-mi taaneqartut saniatigut pissutsinut allanut aalajangersaasoqarsinnaasoq Naalakkersuisut aalajangiisinnaapput.

Kommunalbestyrelsip nunaminertanik atugassanngortitsisarneranut aalajangersakkat

§ 10. Nunaminertanik atugassanngortitsisarnermut aalajangersakkat § 2, imm. 1, nr. 4-mi taaneqartut kommunimut tamarmiusumut atuuttussangorlugit aalajangersarneqassapput. Aalajangersakkat nunaannarmi nunaminertanit, illoqarfimmi nunaqarfinniluunniit ataasiakkaanut imaluunniit sumiiffit ilaannut aalajangersimasunut immikkut aalajangersakkanik ilassuserneqarsinnaapput.

Imm. 2. Aalajangersakkat makku eqqarsaatigalugit aalajangersarneqassapput:

- 1) nunaminertamik atugassinneqarnissamik qinnuteqaatit assigimmik suliarineqartarnissaasa qulakkeerneqarnissa,
- 2) kommunimut pilersaarusicornermut anguniakkanik naammassinninnissaq, aamma
- 3) sanaartorfissagissaanermut aningasartuutaasinnaasunik kiisalu aningasanik illoqarfiup ineriertorneranut pingaaruteqartunik agguasseriaatsit.

Kapitali 4

Nunaminertanik atugassiisarneq

Nunaminertamik atuisinnaatitaanissamik qinnuteqaateqartarneq

§ 11. Nunaminertamik atuisinnaatitaanissamik qinnuteqaat kommunimi pineqartumi kommunalbestyrelsimit nassiunneqassaaq.

Nunaminertanut qinnuteqaatit tamanut ammasumik saqqummiunneqartarnerat

§ 12. Kommunalbestyrelsi pisussaavoq, illoqarfinni nunaqarfinnilu nunaminertamut atuisinnaatitaanissap inaarutaasumik aalajangiiffingineqannginnerani, qinnuteqaat tamanut ammasumik ilisimatitsissutigissallugu.

Imm. 2. Qinnuteqaatigineqartumi sumiiffiup ilaanut aalajangersimasumut aalajangersakkat atuuttut malinneqarpata, imm. 1-imi ilisimatitsisussaatitaaneq saneqqunneqarsinnaavoq.

Imm. 3. Nunaminertat, illut, sanaartukkat nunaminertanilluunniit atuinerit allat minnerusut imaluunniit pingaaruteqannginnerusut pineqartillugit, ilanngullugit nunaminertamik atuinernik allannguinerit imaluunniit illututnik tunisinermut atatillugu atuisinnaatitaanermik tunniussinerit il.il., imm. 1-imi ilisimatitsisussaatitaaneq saneqqunneqarsinnaavoq.

§ 13. Qinnuteqaammik paasissutissiinermut atatillugu, qinnuteqaammut akerliliissuteqarnissamut ullunit 14-init sivikinnerunngitsumik piffissaliisoqassaaq.

Imm. 2. Qinnuteqaammut akerliliisoqarsimappat, communalbestyrelsip qinnuteqaammik suliaqarnerminut atatillugu akerliliissutaasoq ilanngullugu suliarissavaa.

§ 14. Kommunalbestyrelsi pisussaavoq, nunaannarmi nunaminertamik tunniussinissap nalunaarutigineqarnissaa sioqqullugu tamanna pillugu qinnuteqaat suleqatinut attuumassutilinnut tusarniaassutigissallugu.

Imm. 2. Imm. 1 naapertorlugu tusarniaanermut atatillugu qinnuteqaat attuumassutilinnut nassiunneqassaaq. Tamatuma kingorna tusarniaaffigineqartut communalbestyrelsip piffissaliussata iluani tusarniaanermi akissuteqassapput. Tusarniaanermut akissuteqarnissamut piffissarititaasoq, tusarniaaffigineqartup qinnuteqaammik tigusaqarneraniit sivikinnerpaamik ullunik 14-inik sisivussusilerneqassaaq.

§ 15. Kommunalbestyrelsi pisussaavoq, kommunip illoqarfini nunaqarfifilu nunaminertat suut kommunip pilersaarutai sanaartorfissagissaanissamullu pilersaarutai malillugit tunniunneqartussatut naatsorsutigineqarnersut ingerlaavartumik tamanut saqqummiuttassallugit.

Nunaminertanik atugassiisarneq

§ 16. Kommunalbestyrelsi pisussaavoq, nunaminertamik atugassiinerup nuna tamakkerlugu pilersaarusrusiornermi soqtiginaatilinnut akerliunnginnissaa nakkitigissallugu.

Imm. 2. Aamma nunaminertamik atugassiineq kommunimut pilersaarummut naapertuitissaq, ilanngullugit sumiiffiup ilaanut aalajangersimasumut pineqartumut aalajangersakkat, kommunimut pilersaarummi aalajangersarneqarsimasut, tak. §§ 8 aamma 9.

Imm. 3. Pilersaarusrusiorneq aamma nunaminertat atorneqartarnerat pillugit Inatsisartut peqqussutaanni nr. 11-imi, 5. december 2008-meersumi § 24 naapertorlugu inerteqquteqarnissaq aalajangiunneqarsimanngippat, aammalu tamatuma kingorna sumiiffiup ilaani pineqartumi atuinissamik qinnuteqaateqarnissamut akornusiisumik aalajangersaasoqarsimanngippat, qinnuteqaateqarnissamut piumasaqaatit imm. 1-imi aamma 2-mi naammassineqarsimappata communalbestyrelsi nunaminertamik atugassiisusaavoq.

Nunaminertanik atugassiinernut atatillugu atugassarititaasut

§ 17. Kommunalbestyrelsi nunaminertanik tunniussinerminut atatillugu pissutsit makku pillugit piumasaqaateqassaaq:

- 1) nunaminertamik atuineq,
- 2) akuersissutip atornissaanut sisivunerpaaamik ukiunut marlunnut piffissaliineq,
- 3) sanaartorfissagissaanissamut aningaasartuutinut akiliinissaq,
- 4) pisariaqarpas sanaartukkanut ataatsimoorussanut attaviliinissamut pisussaaffiliineq,

- 5) atuisinnaatitaanerup atorunnaarsinnaanera,
- 6) nunaminertamik atuinerup naaneranut atatillugu saliinissamut pissusitoqaanullu utertitsinissamut pisussaaffiliineq, aamma
- 7) oqartussaasunit akuersissutit pisariaqartinneqartut allat, nunaminertamik atuilinnginnermi qinnuteqaatigineqartussat.

Imm. 2. Pissutsit sumiiffiup ilaanut aalajangersimasumut aalajangersakkanut atuuttunut naammaginartumik suliarineqarsimanngippata, aamma kommunalbestyrelsi pissutsit makku pillugit ilassutaasunik piumasaqaateqarsinnaavoq:

- 1) angallannermut isersinnaanermullu tunngasut,
- 2) ruujoreqarfitt ledningeqarfilli inissisimaffi, aamma
- 3) pissutsit allat, kommunimut pilersaarutip piviusungortinnissaanut pingaaruteqartut.

Nalunaarsuineq

§ 18. Kommunalbestyrelsi pisussaavoq kommunip iluani nunaminertat tunniunneqartut nutaat nalunaarsussallugit.

Imm. 2. Kommunalbestyrelsi pisussaavoq pisinnaatitaaffit pioreersut misissussallugit iluarsaatissallugillu, taamaalillunilu kommunimi atuisinnaatitaaffiusut atuuttut ataatsimut takussutissiorissaat isumagissallugu.

§ 19. Nunaminertanik atugassiissuteqarnerit tamanut ammasuussapput, ilangullugit nunaminertamik atugassiinermut atatillugu atugassarititaasut, tak. § 18.

Imm. 2. Paassisutissat mianerisariallit inunnut ataasiakkaanut tunngasut, nunaminertamik atugassiinermi allassimasut imm. 1-imut ilaatinneqanngillat.

Kapitali 5

Atuutsitsilernissamut aalajangersakkat

§ 20. Nalunaarut 1. marts 2009-mi atuutilerpoq.

Namminersornerullutik Oqartussat, ulloq 26. februar 2009.

Kim Kielsen

/

Steffen Ulrich-Lynge

Namminersorlutik Oqartussat

Imaneq 4

3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut